

longe tamen majoribus, semine racemoso in summo caule, flores non observavi, nunquam se aquis exerit, nec purum aërem videt, Olorinam accolæ vocant, quam nondum Botanici observarunt, sicut nec innumeras alias hujus climatis indigenas plantas: hanc sectantur Cygni, hac libenter vescuntur, unde tanta iis cum hoc lacu familiaritas. Iam si urbem spectes, nullus ædibus nitor, nullus talis cultus, qualem tam beata postulat regio, quod plane incolarum socordiam arguit: at introgresso nihil in mensa desiderabitur, larga omnia, optima omnia. Gens comis, hilaris, aperta, & in epulas, pocula præsertim effusa.

Fama refert Thomæ Randulfo, fortissimo hujus regionis Comiti, à bello reduci occurrisse magnum viduarum hujus urbis agmen, quarum viri in acie ceciderant, orbitatem & egestatem deplorantes, illum misertum statuisse, ut ager suburbanus in partes secaretur, quæ postea hodieque octavæ vocantur, non à numero, multæ enim sunt, sed id nominis placuit dari: statuisse præterea ut temporibus futuris civium viduæ earum partium usumfructum ad vitam haberent, quarum mariti possesores decessissent, quod nunc quoque tenetur.

Supra Elginam, Forressam, Narnam, in mediterranea pergenti occurrunt colles & regio aridior, neque inferiori comparanda; hanc *the brae of Murray*, id est, Moraviam superiorem appellant, ulterius procedenti sylvestria, avia, montes, herbidaque valles videntur.

Strath-Arkeg.

Superfunt tres regiunculae, Strath-Arkeg, Strath-Nairn, Strath-Herin (nam Strath-Spæam in alium locum rejicimus) non est quod iis immoremur. Strath-Arkeg, vel Strath-Eriggeg, vel ut effertur Strath-Herrig, ad fluviolum ejusdem nominis, qui se in Nessum lacum exonerat, posita est. Tota aspera, lacubus, rivulis, montibusque distincta, vicatim habitata: ad Baronem Fraseriam de Lovatt ejusque clientes pertinet.

Strath-Narnia meliore solo ad decursum Narni fluvii sita, & à variis dominis possidetur.

Strath-Herina secundum Findornum jacet, Moya lacus, & in ejus insula ædes Makum-Toish dynastæ, quæ vox Thani filium significat. Thani hi antiquitus præfecti Regionum erant, primæque nobilitatis proceres. In horum locum circa Malcolumbi tertii tempora successere Comites, ignotum antea hic dignitatis genus. Dynasta hic antiquissima & late sparsa familia Princeps est, ea tribus Catanæa appellatur. Tribus hæc per hunc tractum sparsa est, etiamque in multis inferioris Moraviæ locis. Badenocham etiam eorum propago tenet, sub nomine tribus Pharsaneorum, etiamque Marriam superiorem sub nomine filiorum Ferchardi.

Præfectura juridica Elginæ & Forressæ ad Dumbarorum familiam hæreditarie pertinet, quæ in locis circa Forressam late dominatur, & ad Comites Moravios ejus cognominis (qui jam à longo tempore defecerunt) originem referunt. Circa Elginam, ejusque viciniam Innesiorum gens (Dumbarorum æmula) cujus familiæ princeps Baro Innesius, suas sedes habent.

Moraviæ Comitum titulus sæpe diversas domus expertus est, cujus historia incerta & confusa est. Eum tenuit Thomas Randulfus Roberti primi Regis ex sorore nepos, vir non sine laude dicendus, qui extincto avunculo, magna fide & fortitudine Regnum proregis titulo administravit. Postea transiit ad Dumbaros. Duglassii eum circa Iacobi secundi tempora tenere, aliquando ad fiscum devolutus est. Quandoque Huntillai Comites in eum jus sibi acquisiverunt, quo privati à Maria Guisia dotaria regni, Maria Regina ejus filia hoc Comitatu donavit fratrem Iacobum postea proregem: ejus illustrissimus & nobilissimus pronepos, nunc hujus Comitatus titulis & proventibus feliciter potitur.